

Waerachtige Historie Van de Martelaers Van Gorcom

Estius, Wilhelm

Antwerpen, 1604

Capittel XXX. Hoe H. Lenaerd op onser Vrouwen Besoeckinghe dagh heest
ghepredikt.

[urn:nbn:de:hbz:466:1-64552](#)

ren en soude. De welche ghelyck-se uit gheheel Engelandt ende Duydts-landt langhe gheiaeght is/ hoe soudt moghelyck gheweest hebben / dat ghy die hier soudt behouden ? Op dese proposten en heeft H. Nicolaes niet oft seer luttel gheandt woordt / wel wetende dattet meer tijdt was te swijghen dan te spreken. Maer men seght dat dese mensche met noch eenen anderen vorgher eenen zeep-sieder seer ghearbeindt heest / dat alle Papen ende Monicken die te Gorcom waren souden van cante gheholpen worden. Dit zij ghenoegh van t' ghene dat den ghe-
vanghenen all-doen ouer-comen is.

C A P I T T E L X X X .

Hoe H. Lenard op onser Vrouwen Besoeckinghe dagli heeft ghepredikt.

S'Ander-daeghs op onser Vrouwen Besoeckinghe gheboden heylighen dagh is Heer Lenard de Pastoor / ghelyck besproken was / ghecomen inde Parochie-kercke / die-men noemt de groote kercke om te prediken het woordt Godts / ende is gheclommen opden cancel oft predik-stoel / van den welcken hy in syne sermoonen som-tijds plagh te segghen : Al-soo lange als ick op dit hout staen sal / en suldt-dy van my niet hoozen van de bloote waerheydt. Daer was vele volcks / maer ick soude qua-
lyck connen segghen ofter onder hen meer bocken en woluen waren oft schapen om huns Pastoors sermoon te hoozen . Vele warender ghecomen vande Geusche ghelintheyd / om die redene princ-
palijck dat sy verwachteden de puere ende loutere predicatie van Godts woordt / ghelyck hun wijs
ghemaect was dat hy belouet hadde. Maer hy niet ontfiende de tegen-wordigheyt van soo vele vpan-
den /

den / heeft ganschelyck ende Catholijckelijck ghepredikt als van te veuren. Hy noemde de glorieuse maghet dicktewils de Moeder Godts / ende de Coninginne des hemels: d'een teghen de Her-doopers/ de welcke loochenen dat de Sone Godts uyt Maria gheen lichaem aen-ghenomen en heeft: d'ander teghen de ketters in't ghemeyn / die deur-gaens al-tijdt snateren teghen den los ende aen-roepinghe vande Moeder Godts ? Oock mede discouerde hy seer gheleerdelyck ende claelijck van haer ghe-duerighe marghdelijckheypdt teghen de oude veur-ledene ketters : vermanende met eenen ende radens de (ghelyck hy te veuren dicktewils plagh te doen) soodaer eenighe waren die in contrarie opinie moghten verleypt wesen / die noch niet te vollen te vreden en waren met t'ghene dat hy in't sermoon gheslecht hadde / oft noch enigh achter-dencken souden moghen hebben / dat sy vryelijck tot hem souden comen / hy soude hen de Catholische waerheydt volcome-lijcker uyt-legghen / ende de selue niet schriftelijcke ghetuyghenissen ende behoochlycke argumenten bevestighen. Hy toonde veur-waer in dit sermoon een groote ende sonderlinghe vromigheypdt / ende ghe-lijcksyne naem mede-bringt een leeuws herte teghen sijn wedcr-partje . Oock een groote liefde heest-men den goeden herder sien toonen tot sijne schaepkens / als hy hen met ghewichtighe woorden vermaende tot vol-herdigheypdt in't Catholijck ghe-looue . En veur-waer des-ghelycke affectie tot sijne onder-saten hadde hy noch on-langhs bewelen in sijn leste sermoon veur het ouer-geue vande stadt . In het welck bouē vele andere middelen mette welcke hy sijn hoorders vermaende tot de Catholijcke religie vast te houden ende veur te staen / ende den eedt die-men de Coninghlycke Maesteyt ghedaen hadde

hadde niet af te gaen / wat ghemack oft onghemack
 datter oock veur quame / soo heeft hy oock dusdani-
 ghe woorden ghebruyckt : Ist saecke dat ghy dese
 soldaten vande Geusen ghesonden binnen de poorten
 laet comen / sy sullen v vele schoone heerlycke
 dinghen belouen / maer ghy sult wel haest metter
 daedt ghewaer worden / hoe luttel dat sy houden
 van hunne trouwe ende beloosten . Ende oock de
 ghene die naer de conste van dese soldaten langhe
 hebben ghehaeckt / meynende daer vele goedts ende
 profyts af te ghenieten / die en sullen't niet al naer
 hunnen sinne hebben als sy se inde stadt sullen ont-
 fanghen hebben . Maer dan sult ghy achter-naer
 al te sainen / later dan het v goedt sal wesen / bevin-
 den ende verstaen wat soerte van menschen dat ghy
 inne-ghelaten sult hebben . Hier by voeghde hy dit
 slot van syne woorden : Waer't saecke dat ick v myn
 schaepkens niet lief en hadde / ick soude nu veur-
 waer swijghen . Want opden seluen daghe ende
 ure / als hy dit seyde / soo wierden vande Geusen
 vast soldaten beschreuen ende aen-ghenomen inde
 naeste veur-stadt aende poorten binnen de welcke dit
 sermoen opde strate onder den blauwē hemel wierdt
 ghepredikt / deur dien de Capelle by de vesten ende
 poorte vander stadt / daer't dien dage Kerck-wijinge
 was / soo vele volcks niet en conste beslupten . Maer
 de poorten wierdt om des vyandts wille ghesloten
 ghehouden . Al-soo cleyn onder-scheedt van plaetsse
 wasser tusschen hem ende den vyandt als hy dese
 dinghen in't sermoen verhaelde . Voort-aen in't
 sermoen daer ick eerst af begon te spreken / d'liste
 dat hy veur sijn ghemeynste heeft ghepredikt / naer
 dat hy de Catholische waerheyt vande alder-
 heylighste Moeder Godts ende Maghet hadde uyt-
 ghelegh / daer teghen-wordigh waren ende nerste-
 lijk

lijck toe-lipsterden niet alleen de Geusen vander
stadt / maer oock vele andere / die om de religie te
bederuen van hupten met de soldaten versch inde
stadt waren ghecomen / soo heeft hy de sijne met dit
leste woordt al-dus vermaent : Blyst doch staen
bidde ick u / vroume borghers / blyst staen ende vol-
hardet stantaftigh in't Catholijck ghelooue . Dit
leste woordt bouen alle andere woorden / die hy
naer- volghende de Catholijcke leeringhe ghespro-
ken hadde / hebben de ketters aller-qualijckste ghe-
noimen / wel ghevoelende hoe dat hy het gheheelser-
moon ghestoten hadde verre contrarie van hunnen
sin / ende anders dan sy verwacht hadden . Hier-
om hebben sy van doen af oorsaecke en bequamig-
heydt ghesocht om hem weder-om ghevanghen te
leyden ende met den anderen ter doodt te brenghen .
Maer en hebben niet goedt ghevonden t'selue ter-
stondt te bestaen sonder eenigh waer-schijnelyck
decksel / vreesende de ghemeinte / inde welcke noch
vele waren Catholijck / andere oock wanckelbaer
ende twijfelachtigh in't ghelooue / maer nochtans
hunnen Pastoor wel ende goedertierlijcken toe-
gedaen . Want om de selue oorsaecke ist ghebeurt dat
inde eerste beeldt-stormerie die in't jaer 1566 . soo vele
vermaerde steden van Neder-landt heeft ouer- val-
len / tot desen tydt toe ende noch een weynigh daer
naer / de Geusen niet en hebben derren binnen Gor-
com de heylige belden inde kercken af-worpen /
hoe wel dat sy oock de ouer-handt hadden . Want
nauwelijcks en hebben sy dit boos feyt ten lesten
derren bestaen naer dat sy de straten ende de hoofd-
kercke wel besett hadden met gewapende soldaten /
op datter van het volck gheen op-loop en soude
gheschieden .

C A P I T -